

Morning Regional Dogri News Bulletin, 20th April 2024

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

1. दफा 370 हटने दे बाद जम्मू कश्मीर च पैहले आम चुनां च कल उधमपुर लोकसभा सीट लेई 68 फीसद कोला मता मतदान।
2. टनंतनाग-राजौरी सीट लेई दाखल कुल 25 नामजदगिएं दी जांच पड़तान अज्ज कीती जाग।
3. उपराज्यपाल मनोज सिन्हा होरें जम्मू कश्मीर च जारी विकास परियोजनाएं च मकामी नोजवानें गी कम्मै पर लाने दा निर्देश दित्ता।
4. जम्मू-श्रीनगर राश्टीय जरनैली शिड़क फिलहाल गड्डिएं दी आओजाई लेई बंद। शिड़कै परा पस्सिएं दा मलबा हटाने दा कम्म जारी।
5. आईपीएल च कल लखन सुपर जायंटस नै चेन्नई सुपर किंग्स गी 8 विकटें कन्नै हराया।

<><><><><><>

Udhampur

दफा 370 दे हटने दे परैंत केन्द्र शासत प्रदेश जम्मू कश्मीर च पैहले गेड़ दा चुनां शांतिपूर्ण ढंगे नै होआ ते मतदाताएं दी बड़ी मती गिनतरी नै अपना बसा-भरोसा लोकतंत्र च फही पक्का कीता ऐ। उधमपुर-कठुआ पार्लिमानी हल्के च बरखें दे बावजूद 68.27 फीसद मतदाताएं अपने हक्कै दा इस्तेमाल कीता जेहड़ा जे राश्ट्रीय आंकड़े 62.42 फीसद कोला मता ऐ। आकाशवाणी जम्मू संवाददाता मूजब जिलावार स्थाबै किशतवाड़ च 67.75, डोडा लेई 66.42 फीसद, रामबन लेई 62.42 फीसद, उधमपुर च 70.76 ते जिला कठुआ च 70.06 फीसद रेआ। इस मौके 11 ज्हार चुनां कर्मी कोई 2 ज्हार 637 मतदान केन्द्रें च तैनात हे, एहदे च 19 पिक मतदान केन्द्र बी शामिल न जित्थें महिला कर्मी तैनात हियां ते कोई 16 लक्ख 23 ज्हार मतदाताएं चा 11 लक्ख 7 ज्हार मतदाताएं अपने हक्कै दा इस्तेमाल कीता ऐ।

<><><><><><>

3rd Phase

7 मई गी लोकसभा चुनां दे त्रिये गेड़ लेई नामजदगी दे कागज-पत्रें दी जांच अज्ज होग। इस गेड़ लेई नामांकन पत्र भरने दा समां कल संजा'लै समाप्त होई गोआ। 10 राज्यें ते दो के- शासत प्रदेशें जेहदे च अनंतनाग-राजौरी पार्लिमानी हल्के शामिल न, 7 मई गी त्रिये गेड़ तैहत मतदान होग। मेदवारी वापस परताने दा सोमवार तोड़ी दा समा होग। लोकसभा दे चौथे गेड़ लेई नामजदगी भरने दा कम्म वीरवारें गी शुरू होग। 9 राज्यें ते इक के- शासत प्रदेश च फैली दिएं 96 लोकसभा सीटें लेई 13 मई गी इस गेड़ च मतदान होंगन। इआं गै आंध्रप्रदेश च 175 सीटें लेई इक्कले गेड़ दे असेंबली चुनां ते ओडिशा दे 28 हल्कें च पैहले गेड़ दे असेंबली चुनां लेई अधिसूचना जारी कीती गई ही।

<><><><><><>

Anatnaag-Rajouri(byte)

अनंतनाग—राजौरी पार्लिमानी हल्के लेई नामजदगी भरने दा कल संजा लै समा मुक्की गेआ। नमीं बनी दी सीट लेई 7 मई गी चुनां होंगन जिस लेई 25 मेदवारें नामजदगी दे कागज—पत्र सौंपे न। कागज—पत्रें दी जांच अज्ज होग ते सोमवार 22 अप्रैल तोड़ी मेदवार अपना नामांकन पत्र वापस परताई सकदे न। इस हल्के थमां मुख्ख मेदवार जम्मू कश्मीर दियां साबका मुख्खमंत्री ते पीपुल्स डैमाक्रेटिक पार्टी दियां अध्यक्ष महबूबा मुफ्ती, उनैशन कांफ्रेंस दे वरिष्ठ नेता मियां अल्ताफ, अपनी पार्टी दे जफर इकबाल मन्हास ते डैमाक्रेटिक अजाद पार्टी दे मोहम्मद सलीम परें होर न। निक्की सियासी पार्टिएं दे अलावा नेकां अजाद मेदवार बलदेव कुमार, जम्मू च इसलै रवा'रदे मोहाली पंजाब दे बसनीक होरें बी इस हल्के थमां नामांकन पत्र भरेआ ऐ। जिस करी ओ केन्द्र शासत प्रदेश च चुनां लड़ने आले पैहले गैर—मकामी मेदवार बनी गेदे न। इस मौके जिला चुनां अफसर सर्ईद फक्रूद्दीन हामिद होरें दस्सेआ.....बाईट

<><><><><><>

Campaigning Jammu

26 अप्रैल गी दुए गोड़ दे चुनां लेई जम्मू—राजौरी पार्लिमानी हल्के लेई चुनां प्रचार तेज होई गेआ ऐ की जे बक्ख—बक्ख सियासी पार्टिएं दे नेता इस बक्खी अपना रूक्ख करी लेआ ऐ। बीजेपी मेदवार ते इसलै दे सांसद जुगल किशोर शर्मा होरें कल अम्ब गरोटा ते अखनूर इलाकें च सार्वजनिक बैठकें गी संबोधत कीता ते केन्द्र च बीजेपी सरकार आस्सेआ पिछले 10एँ ब'रें दरान कीते दे कम्में लेई वोट मंगे। इआं गै कांग्रेस मेदवार रमण भल्ला होरें बी जिला सांबा च सार्वजनिक बैठक कीती ते बदलाव लेई मतदान करने दी मतदाताएं गी गुजारश कीती।

<><><><><><>

Bhrammos

भारत नै कल फिलिपिंस गी भ्राहमोस सुपर सोनिक क्रूस मिसाइल दी पैहली खेप गी सौंपी दित्ता ऐ। अधिकारिक सूत्रें मूजब पैहली खेप गी भारतीय हवाई फौज दे यातायात—वाहक जहाजें राएं पजाई गई। फिलिपिंस एह तंत्र फिलिपिंस दे आधुनिकी करण कार्यक्रम चा दो तांई सशस्त्र बलें गी नमें सिरिया मजबूत बनाने लेईगैह पुट्टा'रदा ऐ। जनवरी 2022 च फिलिपिंस नै भारत कन्नै 3 सौ 75 मिलियन डॉलर दे सौदा कीता हा, जिस राएं भारत—रूस बश्कार मिसाइल दे सांझे कार्यक्रम लेई पैहला आयातक बनी गेआ।

<><><><><><>

LG Skill Dev.

उपराज्यपाल मनोज सिन्हा होरें जम्मू कश्मीर च विकास परियोजनाएं च मकामी नोजवानें गी कम्मै पर लाने च बाद्धा करने दा निर्देश दितता ऐ। एहदे अलावा उनें ई—श्रम पोर्टल राएं बेरोजगार नोजवानें ते मजदूरें दे नां गी दर्ज करने दी प्रक्रिया गी तरतीब देने पर बी जोर दित्ता ऐ। कल हुनर विकास ते रोजगार मैहकमे दे कम्मकाज ते मिशन यूथ दी कारकरदगी दा जायजा लैने लेई सददी गेदी इक बैठक दी अध्यक्षता करदे होई उपराज्यपाल होरें आक्खेआ जे नोजवानें दी छमताएं ते हुनर गी होर नखारने लेई सख्त मेहनत ते तनदेही कन्नै कम्म करने दी लोड़ ऐ तां जे उद्योगें कारखाने च मजूरें श्रमकें ते हुनरमंद कर्मचारिएं दी मंग मताबक उनेंगी तैआर कीता जाई सकै। उपराज्यपाल होरें सरकार दे सब्बनं मैहकमे ते एजेंसिएं गी हुनर विकास बक्खी चेचा ध्यान देन, मजूरें श्रमकें ते कर्मचारिएं दे अधिकारें दी रक्षा ते उनेंगी घट्टोघट्ट उजरत, सेहत सुविधा ते समाजी सुरक्षा देना जकीनी बनाने पर बी जोर दित्ता।

<><><><><><>

America-Pakistan

अमरीका नै पाकिस्तान गी अलेस्टिक मिसाइल घटक उपलब्ध कराने लेई ची नदी त्रै कंपनिं ते बेलारूस दी इक कंपनी पर प्रतिबंध लाई दित्ता ऐ। ची नदी इनें कंपनिं दे नां न जियान लोज टैक्नालोजी डेवलमेंट, तियान्जिन क्रिएटिव सोर्स इंटरनेशनल ट्रेड ते ग्राम्पैक कंपनी लिमिटेड बेलारूस दी कंपनी दा नां ऐ—मिंस्क बहील ट्रेक्टर प्लांट। इनें कंपनिं पाकिस्तान गी इसदी लम्मी दूरी दे मिसाइल प्रोग्राम सनें बेलेस्टिक मिसाइल प्रोग्राम लेई मिसाइल च इस्तेमाल होने आली सामग्री मुहैया करोआई। अमरीकी विदेश विभाग दे प्रवक्ता मैथ्यू मिलर होरें दस्सेआ जे एह संस्था नेही गतिविधिं ते लैन-देन च लग्गी दियांन जेहड़ी सामूहिक तबाही दे थेआरें जां उंदी बंड दे साधने दे प्रसार च भौतिक रूप कन्नै योगदान करदियां हियां। एहदे च पाकिस्तान आस्सेआ नेही चीजें दा निर्माण, अधिग्रहण, उनें गी रखने, विकसित करने, भेजने जां इस्तेमाल करना शामिल ऐ। प्रवक्ता नै आक्खेआ जे अमरीका दुनिया च प्रमाणु अप्रसार बवस्था गी मजबूत बनाने लेई नेही गतिविधिं दे प्रसार च समर्थन करने आले खरीद तंत्र गी रोकने लेई वचने बददे दा ऐ।

<><><><><><>

Railway Trips

भारती रेलवे नै इस म्हीने दी 14 थमां 16 तरीक दी त्रऊं ध्याड़े दी लौहकी जनेही अवधि च 2 करोड़ 86 लक्ख लम्मी दूरी आले मुसाफरें गी इक थाहरा थमां दूई थाहर पजाया ऐ। भारती रेलवे सोये आले मौसम च मुसाफरें दी भारी भीड़ गी घट्ट करने लेई पैहलल अप्रैल थमां 30 जून तगर 9 ज्हार 111 बाद्धू रेलें दे फेरे लोआरदी ऐ। इस म्हीने दी 15 तरीक तगर इक करोड़ थमां मते लम्मी दूरी आले मुसाफर रेल दी इस सुविधा दा फायदा लेई चुके न।

<><><><><><>

NH-44

जम्मू श्रीनगर राष्ट्रीय जरनैली शिड़क एनएच-44 मेहडु, गंगरू ते किश्तवाड़ी पत्थर इलाके जित्थें कल भारी बरखा दे चलदे पस्सियां पौने कारण रस्ता बंद होई गोआ हा, उत्थें मलबा हटाइयै रस्ता खोलने दा कम्म जारी ऐ। रामबन थमां साढ़े जिला संवाददाता नै ट्रैफिक पुलस दे हवाले कन्नै जानकारी दित्ती ऐ जे जनता गी रस्ता पूरी चाज्जी साफ नेई होई जाने तगर जरनैली शिड़कै पर यात्रा नेई करने दी सलाह जारी कीती गोई ऐ। तोआई किश्तवाड़-सिंथन, अनंतनाग ते भद्रवाह चम्बा शिड़क केई थाहरकं बर्फ पेदी होने कारण गडिडं दी आओजाई लेई बंद ऐ।

<><><><><><>

Weather

तोआई कल बरी दी बरखा दे बाद समूलचे जम्मू प्रांतै च तापमान मता झिगड़ा आई गोआ ऐ। जम्मू च जित्थें 8 मिलीमीटर बरखा पेई उत्थें गै कटड़ा च 11 मिलीमीटर बनिहाल च 16 ते बटोत च 16.2 मिलीमीटर बरखा रिकार्ड कीती गोई। जम्मू च कल दिने दा बद्धोबद्ध तापमान 31.8 डिग्री सैल्सियस ते जंदी रातीं दा घट्टोघट्ट तापमान 17.9 डिग्री सैल्सियस रेहा। मौसम विभाग नै अज्ज मौसम साफ रौहने दी पेशगोई कीती दी ऐ।

<><><><><><>

IPL

आईपीएल क्रिकेट च कल रातीं लखनऊ सुपर जायंटस नै चेन्नई सुपर किंग्स गी 8एं विकटें कन्नै हराई दित्ता। 177 रंजें दे लक्ष्य दा पिच्छा करदे होई लखनऊ सुपर जायंटस नै 19 ओवरें च 2 विकटां मुआइयै 180 रंज बनाई लैते। के.एल.राहुल नै 53 गेंदें च शानदार 82 रंज बनाए। एह्दे शा पैह्ले बल्लेबाजी करदे होई चेन्नई सुपर किंग्स नै तैह् 20 ओवरें च 6 विकटें दे नुकसान पर 176 रंज बनाए। रविन्द्र जडेजा नै 40 गेंदें च सब्बने शा मते 57 रंज बनाए। के.एल.राहुल गी मैच ऑफ द प्लेयर घोषत कीता गेआ। अज्ज दिल्ली च दिल्ली कैपिटल्स दा मकाबला सनराइजर्स हैदराबाद कन्नै होग।

<><><><><><>

